

Cun cuors sils fastitgs dil «Meister da Vuorz»

■ (anr/hh) Sonda, ils 2 da fenadur, venderdis, ils 22 da fenadur e venderdis, ils 30 da settember 2016 han cuors da frescos liug a Vuorz. L'annunzia ha da succeder mintgamai quater dis avon.

Ils cuors vegnan menai da *Brigit Bütikofer Senn*. La restauratura che viva a Trin ei engaschada sin plazzals cun pictura murala en Svizra, la Germania e la Frontscha. En museums e labors ha ella profundau sia savida davart las tecnicas da malegiar vid preits, seigi ord vesta historica ni era regiunala. Ella enconuscha las atgnadads da quella pictura, denter auter era dalla tecnica da frescos. Bütikofer ha denton era luvrau vid la restauraziun dils frescos dil «Meister da Vuorz» ella catedrala a Cuera. Sias experientschas e sia savida davart quella tecnica d'artisanadi da pli baul dat ella vinavon ussa, denter auter cun in cuors davart la creaziun da frescos. Ils cuors duein avischnar las participontas ed ils participonts alla tecnica da frescos sco quei ch'ella ei vegnida applicada a sias uras ella baselgia a Vuorz. Co il pictur artist che

ha malegiar denter auter ils gronds maletgs ella baselgia da Vuorz ha num san ins buca. Ni a Vuorz ni en auters loghens dil Grischun ch'el ei staus activs han ins fastitgs exacts da sia derivonza. Il num «Meister da Vuorz» ha el obteniu dil historicher d'art Erwin Poeschel. El sedrezza tenor sia pli impurtonta ovra: Il ciclus dalla passiuon ella baselgia evangelica a Vuorz. Dils specialists digl art vegnan las ovras dil «Meister da Vuorz» taxadas per las pli impurtontas dalla regiun e da gronda muntada per l'entira Svizra. Ellas vegnan classificadas denter las meglieras prestaziuns digl art aultgotic el nord dallas Alps. Da lur qualitat extraordinaria dattan en special las ovras ella baselgia reformada a Vuorz perdetga. Malgrad lur vegliadetgna da plirs tschiens onns ein ellas aunc adina frestgas e fetg bialas.

Il liug da sentupada ei la Piazza Cadruvi – la staziun digl auto da posta – a Vuorz. Ils cuosts per material e gentar muntan 210 francs. Ulteriuras informaziuns inclusiv l'adressa d'annunzia ein da catter sin la homepage www.waltensburger-meister.ch



In dils bellezza frescos ella baselgia a Vuorz.

FOTO H. HUONDER